

袁文笈正壹

71427
S4042

文天祥集

表
文
箋
正

光緒壬午長
夏汗青籀鐫

袁文箋正序言

吳縣石韞玉撰



天地之道一奇一耦文章載道之器故有奇而不能無耦
焉漢京旣東駢體漸作至六朝而大盛凡朝廷典冊軍府
文移史官論讚公卿啟事朋友竿牘以及浮屠老子之書
豐碑幽宅之銘無往而不駢體者其文炳焉與六藝同風
杜少陵曰王楊盧駱當時體不廢江河萬古流誠鄭重乎
其言之也當今崇尚古學惟翰林供奉之文尚沿聲律對
偶其他皆用古文故駢體非藝林先務然習而工者亦不
少其人仁和袁簡齋先生之論則曰本朝開國以來尚

未有能以四六成一家之言者竊欲自立一幟闢其意殆
自命爲當代第一手矣先生抱沈博絕麗之才胸羅萬卷
筆埽千人所著詩古文靡不升古人之堂而躋其裁特斤
斤以四六自命儻亦果有出乎其類拔乎其萃者耶余少
學爲古文不習駢體自入翰林後職有司存偶一爲應奉
之作所作不多心亦不好也洎爲外吏益棄去不復省邇
來歸田無事重鑽故紙聊以消耗壯心適得是編覺其鯨
鏗春麗怪怪奇奇眞天地閒別是一種文字近世果無能
頡頏者劉舍人所謂樹骨訓典之區取材宏富之域殆庶
幾焉顧其學博其辭贍直如杜詩韓筆字字皆有來歷讀

者不知所出輒茫然興望洋之歎迺不揣固陋於三餘之暇倣李善注文選之例一一箋釋之間有舛譌則加按語以訂正之夫人讀書既多涉筆卽奔赴腕下不能字字檢點古今通人類皆如是不必爲先生諱也積三年之功大約得其十之八九同學之士請曰天下之寶當與天下共之是編也讀者每苦於欽其實莫名其器今旣十得八九可以出而示人矣古人撈犁不識爆稍不知必欲一字不遺一事不漏恐非可以旦夕期也余曰諾因授之梓旣梓後復有所得卽補於本文之尾或誤注者亦隨時訂正於後尚有闕誤惟冀高明之士補正之時嘉慶壬申夏六月

故江寧縣知縣前翰林院庶吉士袁君枚傳

澄清堂稿

袁枚字子才號簡齋浙江錢唐人幼有異稟年十二爲縣學生二十一在廣西巡撫金鉷署爲銅鼓賦援筆立成不加點竄鉷愛其才會開博學宏詞科舉枚應詔入都以乾隆三年戊午科順天舉人中己未科進士選庶吉士故事翰林習國書勿預漢文考校掌院史文靖詒直奇其才命擬奏疏一通曰通達政體賈生流也散館以未嫻清字改知縣分發江南初試溧水調江浦沐陽再調江寧枚常言爲守令者當嚴束家奴吏役使官民無壅隔則百弊

自除其爲政終日坐堂皇任吏民白事有小訟獄立判遣
無稽畱者多設耳目方略集鄉保詢盜賊及諸惡少姓名
出所簿記相質證使不能隱則榜其姓名許三年無犯湔
雪之姦民皆斂迹方山谿洞外兩氓爭地無契券久訟莫
能斷枚視案山積笑曰此左氏所云晉鄭之間有隙地王
暢頓邱是也訟久則破家吾當爲汝了之乃盡去舊案別
給符驗使各開墾升科聞者皆歎賞有賈人販布江行舟
觸礁船溺死一兵眾兵縛控舟子兼及客枚心知過失殺
無罪而累客必傾貲乃令乘風張帆作觸舟狀縱之去以
埋葬錢發兵完案侍郎尹會一督學試江寧有兩騎衝其

前麾且嫚罵稱親王家奴他縣尹不敢問枚立擒治則爲
大將軍投書制府者也搜其篋得關節書十餘封悉焚之
重撻遣去十三年江南災銅井民運米至吳門有率眾劫
之者枚以荒政當弛刑召其魁詢之乃土人遏糶非劫也
諭以情法追米還之上司歎賞枚得政體其敏而能斷類
此初枚爲溧水知縣其父自廣西來慮枚年少不諳吏治
乃匿姓名訪諸野有女子告曰吾邑袁知縣政若神明其
父乃大喜入署其後土人多以枚斷訟事附會爲小說迄
枚僑居江寧山無牆垣數十年盜賊不忍攘其什物者其
得民如此以母疾去官起復發陝西以知縣用丁父艱歸

遂牒請養母卜築於江寧之小倉山號隨園聚書籍爲詩
古文如是五十年終不復仕是時 國家治安百餘年海
內物力充裕江左當道政事多暇則開閣延賓枚以山人
預其游排日燕樂或慕其風流爭致金幣枚又崇飾池館
高高下下隨山結構襍以五色雲母窗絢爛巖谷畜珍禽
奇獸張燈聳動游人自皇華使者下至淮南賈販多聞名
造請交歡者相國某柄政極豪侈至命工圖繪其園仿而
作第當世大僚有馳書甘執贄門下者一時名譽傾動四
海然枚詠諧跌蕩自行胷懷未嘗爲勢要牽引年逾耳順
猶獨游名山嘗至天台雁宕黃山匡廬羅浮桂林南岳瀟

湘洞庭武夷丹霞四明雪竇皆窮其勝舟車所過攀轅授
館疑古人復生乃至道釋閨閣之能詩者皆就質焉校長
身鶴立廣顙豐下齒如編貝聲若洪鐘生平事母孝友于
姊弟母年九十四而終迎養寡姊年至九十妻亦白髮齊
眉一家怡怡如也正家之法井井如也篤于故舊嘗爲亡
友沈凡民司祭埽卅年如一日程編修晉芳死負五千金
往弔焚其券且撫立其孤尤喜汲引後進一時才士多出
其門嘗自稱吾之官不擇日葬親徙宅不用形家言而未
嘗遇患不學仙佞佛而年登大耋不丐貸求索而饋詒者
四方不絕不講學而神解超然又自爲詩云自歎匡時好

才調被天強派作詩人非虛語也昔晉劉惔謂王濛性至通而自然有節嵇康稱阮裕傲然忘賢而賢與度遇忽然任心而心與善游枚其有焉枚旣山居年又最高歷四朝乃取康熙至乾隆間所識名臣事狀諮諏其子孫僚友各編次爲碑傳傳聞或有譌舛然其逸事足以裨益正史自言爲詩專寫性情不得已而逢典故不分門戶乃無心而合唐音又言詩人家數甚多須知王孟清幽豈可施諸邊塞杜韓排奭未便播之管絃沈宋莊重到山林則俗盧仝險怪登廟堂則野韋柳雋逸不宜長篇蘇黃瘦硬短于情韻悱惻芬芳非溫李不可屬詞比事非元白不能范蔚

宗言人識同體之善而忘異量之美此大病也故其所爲詩文天才橫逸不可方物尤長駢體抑揚跌宕得六朝體格撰小倉山房詩文集七十一卷詩話尺牘說部之屬若干卷以嘉慶二年十一月十七日卒年八十有二先是枚自葬其親于所居隨園之西百餘步又營生壙以祔之旁則環葬奴婢工匠及鄰人之無後者纍纍數十家自言吾死不寂寞矣嘗有術者推枚六十二而得子七十六而下世及得子如術者言至七十六以爲當死擬陶潛作自挽詩及其年歲除又作告存詩其曠達之致如此二子曰通曰遲通以弟子爲嗣

舊史氏曰先生有吏才通達政體而議論務出于宏厚雖
不竟其用亦一代循吏也惜退而以文自見然其成就有
足觀焉吾聞句金之間號爲福地世有異人其身名俱泰
與陶宏景代興者矣

袁文箋正目錄

館後學石韞玉輯

卷第一

上尹制府書

與延綏將軍書

上台觀察書

卷第二

慰蔣用菴侍御失火書

答王厚齋書

與蔣苕生書